

## ALI D'AR MAMMO KRISTEN

## JANNEDENN KER

War don : *Ay ger Is*, pe eum aill benag.

- « Lavar d'in, merc'hig a garan,
- « Perak ken nec'hed az kwylan,
- « Perak da dal zo koumouled,
- « Perak da vuzel ne c'houarz ked ? »
- « Ma mammik' kez, arez mervel.
- « N'hellan mui chom enn Breiz-Izel !
- « Me iel' da Bariz hag eno
- « Dre ma gounid m'ho sikouro. »
- « Janned, Janned, ô ma bugel,
- « Chom enn hon zouez, enn Breiz-Izel,
- « Rak mar lezez kerend ha bro,
- « Euz ann dud fall piou da viro ?
- « Gwel eo honestiz ha brud vad
- « Evid arc'hant da rozelad :
- « Chom er vro-ma, mir da furnez,
- « Doue rei d'imp magadurez. »

Na dalve ket d'ar vamm prezeg,

He merc'h a zo ziouaz penneg,

Bea pinvig ha dimezell,

Hennez eo c'hoand ar plac'h di'boell,

Maga he zud zo digare,

Ann dra a glask eo liberte.

Re dost eman, enn Breiz-Izel,

Lagad he mamm d'ar *bompinel*.

Redeg a ra mammzel Janned

Da gad eur *c'houreter* plac'ched

Goulen a ra hag en ne zo

Plas evit hi, pell euz he bro.

Ar c'houreter na deurve ked  
Goulen digand ar seurt plac'hed  
Hagen 'nn ho godele ve kad  
*Zertificad* a vué vad,

Eunn dra dere euz he vicher,  
Karoud plac'hed meurbet seder,  
Plac'hidigo hag a rofe  
Evit pemp kweneg ho ine.

Gret so marc'had, hag hon Janned  
War du Pariz a zo kased :  
Gweled Pariz, beva enn-hi,  
Evit Janned pebez dudi !

Ar plac'h a zonj kavoud enn ker  
Bue diskuij ha dibreder ;  
N'edo, a gred ann diodez,  
Nemet c'hoarzin ouz he mestrez !

Mes gand he mestro hon Janned,  
Kerkend arru, zo gwel nec'hed ;  
Ar re-ze gomz bepret gallek,  
Janned na oar 'met brezonek.

Labour a gav barz ann ti-ze,  
Labour poaniuz, ha noz ha de ;  
Roed a ve vel dre zispriz.  
Ar vilan labour da blac'h Breiz.

Pa deu ar zul, Janned a gred  
A-hed ann de vo diskuized.  
Rak ar c'bleier, er parrozo,  
A c'halv ann dud d'ann ilizo.

Mes digant Janned o tisken  
Evit mond prim d'ann offeren,  
Ann itron a c'houl zouezed :  
— « Perag oc'h-hu ken kaer stiped ? »

— « Itron, evit mond d'an ofiz  
« Evel em bro eman ar c'hiz ;  
« Rak d'am c'herent kend ho c'huitad  
« E touiz chom kristenez vad. »

— « Lezed, mammzell, ar zorc'hen ze  
« Ha labouret vel d'ar pemde ;  
« Enn-berr d'ann noz, al labour gret,  
« C'houi a valeo mar keret. »

A-hed ar zul-ze ar plac'hig  
A vanas trist ha reuzeudig,  
Zonjal re 'nn hec'h iliz parroz,  
'Nn he c'hoarezed, 'nn he c'herent koz.

Diwar neuze ar Vreizaden,  
Pell euz ar c'herio 'vit biken,  
A dlefoa dont, a denn-askel,  
A neve-flamm da Vreiz-Izel.

Rag eun nebeud zulio goude,  
Vel he mestro, Janned, dife,  
A gav kaeroc'h eun noz danso  
Vid eur beurevez pedenno.

Brema enn tog hag enn robenn,  
Janned da vad zo keriadenn ;  
Kozeal *gras*, polki, valzi,  
Redeg enn noz, a bliж d'ezhi

Rederez noz pa deu ann de  
Ober toll labour na garfe :  
Chetu perak mamzell Janned  
Zo gand he mestro argased.

Eman brema war ar ruio.  
Pell euz he zud, pell euz he bro ;  
Ann noz a deu, pelec'h 'n ém denn ?  
Ar paour kez plac'h a goll he fenn.

Bagig hep stor, gant gwall avel,  
A sko bepret war ar roc'hel ;  
Evnig, euz he vamm dianket,  
Gand ar sparfell zo prim paket.

Gand ar Vreizaden penfollet  
E tigoue plac'hed dirollet ;  
« Deuz, eme, merc'hik, deus d'hon zi,  
Boed ha lojeiz e kavi. »

Heuil ra ziouaz ar plac'hed-se,  
Kimiadi ra euz he Doue,  
Kimiadi ra euz ar furnez,  
Eman brema war hent ar vez !!!

Me gred biken ne zistroo  
Al libouden war du he bro ;  
Mes ma tistro war hon douar,  
'Vid be c'herent pebez glac'har !

Eur bugel gant-hi o krial.  
Eun all toled enn hospital ;  
Chetu al loden a viltanz  
A gav Janned enn he zro-Franz.

Breizaden kolled er c'herio  
Na dle biken distrei d'he bro :  
Honnez n'eo ken eur Vreizaden,  
Eur strouillen eo ha netra ken.

Ar Janned-ma a zo hanvel  
Ous kalz a dud enn Breiz-Izel,  
Ous kalz a blac'hed a weler  
Pell euz ho zud o vond enn ker.

Koulz hag ar plac'hed, ar botred  
Evit patrom ho deuz Janned,  
Pa zilezond pal hag arer  
O sonjal dastum aour enn ker.

Evid unan a zastum aour  
Kand a kand all a chomo paour,  
Hag ar re-ma vel ar re-ze  
Nao gwech war deg a goll ho fe.

O Tud iaouank, vel ho Tado.  
Bete mervel chomet nn ho pro ;  
Ma z'eo Franz perlezen ar bed,  
ENN Frans kaeroc'h 'vit Breiz n'euz ked.

Pevien ar c'herio zo e-leiz  
O klask bata war hencho Breiz ;  
Tud iaouank Breiz ve diskiant  
O vond enn ker da glasg arc'hant.

Koulz er c'herio evel war mez,  
A nez labour e ve kernez ;  
Mes al labour ha gras Doue  
Hon mir dre-oll a baourente.

EUR BREIZAD.



No<sup>r</sup> Pierre Even  
Recteur de ~~Pont-l'Abbé~~  
~~Plonbarlanec..~~